
GUERZ

VAR

BREZEL AN TUNISI HAG AN ALJERI

VAR TON : *Va c'haloun a zo fraillet,
pe eunn all.*

Me ho ped 'ta, soudardet, euz a bep seurt arme,
Da zont da glevet brema kana eur verz neve,
Zo savet d'an dud iaouank a ia d'an Aljeri,
Pe d'ober brezel siouaz ! ebarz 'n Tunisi.

Potret ar Gouarnamant a gass ar soudardet,
'Vit ober brezel siouaz ! e bro an Arabet ;
Eleac'h gant ann dienez, an domder, ar skuisder,
He varvont pell euz ho zud 'barz er brassa miser.

En Afrik hag e Tunis e veler ho vervel
Gant ar sec'hed, an dersien, soudardet Breiz-Izel,
Ha lod all lazed ive gant taul an enebour,
Pa'z int bet casset d'ezho gant Republik traitour.

Mar z'eus brezel e Tunis, eo gras d'ar Republik,
A voa æt di da sikour tud da zont pinvidik :
Da zikour marc'hadourien d'ober hentchou houarn,
Enep c'hoant tud ar vro-se hag ar re he gouarn.

Eur vrezel eur ar c'hriassa zo tennet var ar Frans
Gant ar Republicanet, tud fall heb coustians,
Dre ma'z oant eat heb ezomm du-ze d'ann Tunisi,
Ha losket d'en em zevel potret an Aljeri !

Ia ! gant ar Presidant hag an oll Vinistret,
Ar stad reuzeudik siouaz ! euz ar Frans zo karet,
Dre ma hellont evelse ober ho aotrouez
E palesiou alaouret, pell euz al lazerez.

Dansal a reont ha bragal, eva, ober cher vad,
Epad ve ar Fransisien pell du-ze er gombat,
Pell du-ze ho combatti ebarz en Tunisi,
Pe ho vervel en Aljer dre faoutou bras Grevy.

Mar m'omp hirio e brezel siouas ! barz en Afrik,
N'eus den kaoz a gement-se, 'met tud ar Republik,
Ho doa great eur Gouarner d'euz breur ar Presidant,
Evit ober tro dezhan da c'hounit fors arc'hant.

Selaouit c'hoaz, paizantet, ar Republicanet,
Ha guelit penaoz siouaz ! gantho oc'h bet tromplet,
Rak int ho doa lavaret ne vije mui brezel,
En dra vije bet skrivet Republik er baniel.

Kouskoude hon deuz brezel hag eo meurbet skrijus,
Ha stad soudardet ar Frans a zo enghi poanuis,
Pa ze guir renkont mervel heb kaout dour da eva,
Pe lazet gant n'Arabet, tud demeuz ar c'hriassa.

Mistri ar vro a veler e pales ho larda,
Epad voa ar zoudardet, siouaz ! ho tivouada ;
Var ann tachennou brezel dindan brassa tomder,
— Ha d'an dud ar Prefeded 'lar eo mad an amzer !

Er bloaveziou tremenet, poa gullet, Bretonet,
Dre urz ar C'houarnamant skrivet gant ar Prefet,
Ha staget tammou paper euz an oll vogeriou
Evit lavaret deoc'h-hu n'oa ket a vrezellou.

Perak an aotrou Prefet gant ar Gouarnamant
A lare d'ar baïsantet traou oa ken diskiant ?
Anat mad oa d'an oll dud ez oa sur eur vrezel,
Pa'z e guir e voar bemdez kass soudardet pell, pell.

Allas ! ni a voar brema perak omp bet tromplet
Gant potret ar Gouarnamant hag he oll Brefetet ;
En eur rei deomp da gredi n'oa netra en Afrik,
Voa c'hoant hon dije hanvet potret ar Republik.

Guir eo 'vit ar Prefetet hag ho mignonet vras
N'euz brezel ebet hirio na ne deuz bet biskoaz ;
Rag int a vez azezet 'bars e saliou fichet,
Epad ve ar soudardet var dachennou lazet.

An Afrik oa gounezet d'ar Frans gant ar Roue,
Ar Republik 'ra ennhi d'hon tud koll ho bue :
Rak-se guelit, Bretonet, penaoz an Drapo guen
A gasse var gresk atau galloud ar Fransisien.

'Leac'h ar Republik fall-ma 'ra deomp koll hon danvez
Ha d'hor bugale siouaz ! er vrezel ho buhez ;
Birviken ken n'hor bezo na peoc'h, nak urs e Frans
Rak ar Republicanet eo a glask e goal-chans.

Hon Deputeet difeiz 'doa votet eul lezen
Da viret eus soudardet da gaout beleien ;
Ha setu perak siouaz ! int bet guelt o vervel
Heb sakramant na beleg, 'pell d'euz ho Breiz-Izel.

Trist eo guelel eur zoudard vervel pell euz he dud,
Ha beza fourret en douar evel al loenet mud :
Goude m'eo bet pistiget siouaz ! 'barz er stourmad,
N'elli mui kahout eur belek 'vit donet d'her c'hrenvaat.

Setu aze, Bretonet, ar stad meurbet poanius,
En em gav ho pugale gant lezennou skrijus,
Great gant Republicanet d'enebi euz Doue,
En eur denna ar belek, allas ! euz en arme.

Mirit eta, ma Doue, na vezo contammet
Eneou kaer ar vugale e skoliou-milliget !
Zo savet gant kanaillez da goll ar feiz kristen
Ha d'ober d'an dud beva mar gellont hep kredenn !

Ma karje c'hui, Bretonet, pa vijec'h o voti
Eleac'h Republikanet beza choazet mistri,
Mistri leal ha kristen, 'dije great mad ho pro
Hag ho miret euz brezel, hag an traou divalo.

Digassit brema : Doue ! evit ho pugale
D'ar Frans, hor bro garet, Herri pemp evit Roue !

